

四庫全書

集部

欽定四庫全書

盧溪文集卷十九

宋 王庭珪 撰

律詩 七言

夜讀唐鑑有作

開元貞觀承平後羣盜縱橫似撒沙可惜君王自神武  
不知盧杞是姦邪瓜分叛將根仍蔓鼎付哥奴禍已芽  
不有汾陽功第一孰能談笑定中華

次韻蔡德億年聞子規

逐客思歸正倦聞三更枝上月微昏一聲夢斷湘山曲  
千古空餘馬足痕東郭雖無揚子宅西枝應有少陵邨  
不須宋玉憐憔悴招得騷人幾許魂

贈胡紹立

并引

紹立頃年遍遊西南諸州聞余竄夜郎冒重險至  
沅陵由湘南以歸已卯秋預清江高薦復至安成  
訪別道舊賦詩因以送行

憶昔烏蠻絕塞亭巴娘歌罷月三更重尋湘水江邊路

又見蕭灘榜上名此去飛騰對天陞不應顛顛困書生  
將軍三戰成功後未數焚舟老孟明

送項直卿赴省

逐客歸來訪里閭後生文彩益增竒低頭見子如東野  
滿耳聞人說項斯果有高名動場屋行觀大策對丹墀  
親闈日望泥金信報我仍須寄好詩

劉大虛作十花詞相示復以詩來有求揮斤之  
句兼簡中問僕無恙吠犬不為災次韻一首

奉酬

新詞鶻鶻吐春雲清似金爐百和焚白雪固宜招吠犬  
真雷豈比聚飛蚊陶潛賦就歸何處李白詩成思不羣  
君是廣寒修月手顧予安敢強施斤

次韻董體仁叅政

雷雨何年下九天公為舟楫濟長川涸鱗亦逐龍蛇動  
異氣先衝北斗邊總謂相君扶帝力忽傳飛詔落巖前  
但隨一氣洪鈞轉造物豈知然不然

次韻李昌齡以詩督景賢堂詩

李廣傳云得當單于陵傳亦云

欲得當以報漢

欲醫詩病了無方  
悵望黃州舊雪堂  
歲月易奔梭一擲  
文章徒費紙千張  
相如賦麗終遲思  
李廣兵微未得當  
句律年來亦如此  
收功何以得鷹揚

宋英臣景賢堂

當塗人物盡豪英  
平日相逢眼自青  
傾蓋欲交天下士  
披雲如仰斗間星  
向來道義多耆舊  
尚有風流繼典刑

更待里門容駟馬不應空頂佛名經

劉君鼎主簿登第累年家貧猶待闕欲遊章貢

謁梁提刑作詩送之

收科天陞幾年餘猶似揚雄寂寞居霄漢又生新羽翼  
侯門應許曳長裾暫遊嶺海非凡客却上蓬瀛行秘書  
何日扁舟下螺浦會看丹詔有新除

送劉簡之兄弟赴省

弟兄連榜俱高薦正遇龍飛急詔求  
蘭省深嚴清禁近

丹梯曾上廣寒遊豈惟一舉兩黃鵠便好同修五鳳樓  
草綠江南舊行路春風歸馬控雙虬

謝向提刑見訪

并引

某自貶所東歸伏辱提刑直閣千里命駕來訪死  
生感激高義輒成長句聊伸謝懇

夜郎逐客遇生還秘閣老翁來扣關坐聽犀揮妙言語  
慚非櫛具偉衣冠高名業已照六合賤子窮當隱半山  
陸納家風元冷澹口將茶果薦杯盤

渡湘千里憶分攜因誦癡兒不了詩送我出門還作惡

今朝會面豈前期樂天獨往青山日裴相閒居綠野時

從此功名恐相逼伊山安得久棲遲

李訓王涯排陷樂天訓等死日樂天

正遊洛下青龍寺有詩云當君白首同歸日是我青山  
獨往時或謂白公樂禍東坡云樂天豈樂禍者特悲之

耳余今亦然

### 送魏彥成赴召

一騎追鋒下九重手持丹詔紫泥封君王夜半應前席  
郡國名高莫說功民吏不須留召父朝廷久已知弱翁

還如漢室中興相治行于今有祖風

魏彥成座上忽見擒至吉水賊奉呈彥成

城上啼烏曉欲狂樓前爭看捷旗黃  
略驅部曲千餘騎不折將軍半段槍  
樂土異時為賊窟太平今日有官方  
弱翁治行今如此何待天邊下鳳凰

西園探梅三首

俯窺溪影忽橫斜仰看寒梅已放花  
未覺東風吹水面早驚春色到天涯  
年時肌骨瘦如許日暮烟雲薄不遮

折得一枝歸靜院夜深玉頰照牕紗

東閣官梅未有詩竹林斜出兩三枝臨風玉面如相識  
殘雪江頭想更竒立盡小橋溪上影誰將清調笛中吹  
犯寒傾倒先春色萬木寒癡凍不知

一株斜壓半簷茅索笑誰堪著句嘲風度暗香浮遠水  
枝回嫩綠到新梢冰生處子精神外玉立天涯雪月交  
吟處不須歌酒澆柴門誰許野僧敲

次韻劉景明寄詩求近作

道邊垂柳綠陰陰  
馬上攜書閱古今  
陋巷豈無人載酒  
他鄉誰是子知音  
鯤鵬未化風雲外  
江海相思歲月深  
遠寄雕章覓新句  
窮愁唯有苦寒吟

外孫劉子野遊學南安纔歸數日又告行忽忽  
贈以一詩為別且以勉之

九十龐眉老舅翁  
暫時見汝又西東  
舉頭共看天邊月  
刮目知非吳下蒙  
學至超然應自解  
詩唯窮者乃能工  
太阿鍛盡山中鐵  
始得光芒倚碧穹

送劉天遊益明赴省

兩驥騰風上九垓，瑤林瓊樹絕纖埃。  
行觀海運幾千里，坐待春驚二月雷。  
霹靂一聲天外響，婆娑雙桂月中開。  
老翁日望長安信，報喜泥金早寄回。

次韻曾英發

泮水橋邊不記年，後來誰復敢爭先。  
襄陽耆舊今無在，江左風流寂不傳。  
窮巷閉門佳客至，新詩照壁夜光懸。  
未應晚節嗟流滯，三子青袍慰眼前。

酬梁宰惠遊永新百韻詩

君曾攝  
縣事

聞君跋馬禾川道攀轡遺民識轡環滿野悲風蟠蔓草  
數聲漁笛下汀灣雲藏甘露峯頭寺路接青湘雨後山  
觸思便能成百韻偶題僧壁不須刪

謝郭運幹見訪

歐陽公有思穎  
詩郭乃穎人

窮巷俄留長者韉清風入戶竹生光不嫌茅屋絕低小  
來坐松陰移晚涼南國諸侯老賓客西湖六一舊家鄉  
錦囊賸拾詩千首他日還思穎水傍

天馬從來不受韉騰雲注目電爭光心如銀漢織塵靜  
氣逼金盤曉露涼妙語織成文繡段扁舟刺入水雲鄉  
朝天便若登仙去騶馭何人得侍傍

次韻劉子方喜雪

萬木寒癡凍不蘇六花爭巧出枯株天將平地開銀闕  
人似清冰在玉壺未見嚙氈持漢節徒聞穿履待公車  
月邊恐有瑤臺路擬欲凌空謁帝居

懷故人留題

桃李無言對斜日，可堪回首一淒然。子雲投閣知何在，  
太白騎鯨已上天。春蚓秋蛇留敗壁，金鈎玉帶鎖寒烟。  
人行古木橫塘路，門掩長江上水船。

次韻王秀才

怒髮衝冠忘指瑕，要能全璧始還家。閉門且任蓬蒿長，  
落筆當令綺繡華。麗句美如青玉案，明珠深貯絳囊紗。  
愛君年少已如許，他日相逢未可涯。

波光亭

遶亭春水縠紋生拍岸風微鏡面平日破浪花搖柱礎  
影浮山翠落簷楹魚跳蓮葉東西動月湧金盆表裏明  
夜久光凝妝綠淨冷涵星漢逼人清

醑醪

百花狼藉點青苔始見醑醪爛漫開號國朝天嫌粉污  
唐昌夜月恐仙來寒梅勝韻聊堪友穠李凡姿詎敢陪  
便欲乘風凌倒影醉尋香徑上瑤臺

和黃元授送趙敦本赴萬安宰

元授先攝邑  
事故末句云

欲救斯民病久疴想君家譜有竒方但須去惡猶去草  
要使牧人如牧羊正值彫殘經寇亂還思激烈詠時康  
當年手種閒桃李今日成陰總類棠

和元授閔旱

時男子  
皆防城

早魃凌空氣愈炎斷無微雨應時霑正憂龍卧深蟠水  
安得江聲碎瀉簷禾黍似堪供野火婦姑猶擬共腰鎌  
此時政要調元手誰作商霖慰具瞻

盧溪文集卷十九

欽定四庫全書

盧溪文集卷二十

宋 王庭珪 撰

絕句

建炎己酉十二月五日避亂鵠湖山十絕句

平昔無才可致君此生何處欲超羣  
今逢四海干戈動猶得山間卧白雲

偶攜琴劍入山來驚覺高僧定裏回  
扶下繩牀始開眼嗔人馬跡浣蒼苔

幡竿插入千巖底鳥語飛來絕壁間  
洞口行人迷處所不知鐘梵鎖孱顏

山腰危殿倚青葱知是雲峯第幾重  
恐有書生來問道為憑輕打飯前鐘

竒峯削出青蓮萼遠溜縈回碧玉環  
氣接混茫藏句法不知誰與破天惝

洞裏花開透碧霄溪橫三統赤欄橋  
他年橋斷人迷路

咫尺山源萬里遙

三渡橋

昔人騎鶴嶺頭歸，應有仙居在翠微。  
絕壁蒼藤無處問，

時聞清唳揭雲飛。

白鶴峯

破臘山桃已盛開，飛花無數點青苔。  
莫教流出前溪去，

引得魚舟入洞來。

山桃花

巖下逢人說亂離，十年眼底厭旌旗。  
邊塵復暗江南路，

堪羨山僧總不知。

贈寺僧

偉岸稜稜似立朝，巍峩冠劍想風標。  
可憐有貌無肝膽，

何用昂然近紫霄。

次韻贈周師禹二首

山中自有陶宏景  
牕外誰呼祁孔賓  
不敢移文約周子  
升沈共作太平人

晝卧柴門打不開  
相逢未識濟川才  
那知此夜聞猿處  
忽有新詩隨雁來

贈李子安

窮居未有四立壁  
負郭兼無二頃田  
擬斲雲根結茅屋  
不知誰贈買山錢

次韻高秀才

臘盡梅花落不停  
笛聲孤起不堪聽  
且留溪影弄清淺  
更看殘英動曉星

贈松菴僧

菴在深邨翠嶺均  
狂風捲盡屋頭茅  
斷椽破壁何時理  
卧看松陰月轉梢

和鄭元清同遊殷仲堪讀書臺二首

晉國衣冠掃地空  
漁歌長在水雲中  
倚欄欲問興亡事

木末琉璃墜曉風

池上高臺倚碧空  
郡樓相對出烟中  
讀書太守今何在  
寂寞無人繼此風

梁道人借示丹經數冊閱未遍輒告行歸其書  
贈之以詩二首

丹經汗損幾車牛  
真意難從紙上搜  
相見纏腰無十萬  
待看騎鶴上揚州

夜半滄溟看日頭  
忽聞風雨下層樓  
却尋雙徑朝金闕

又跨蒼龍海上遊

謝彭仲寬惠小茶磨并仙茅二首

踏梯割得紫雲歸  
琢就雙輪半尺圍  
晴日午牕新睡起  
掌中輕轉雪花飛

夢具白雞猶不死  
曾吞赤鳳得長生  
向來未識仙茅草  
誤向松根採茯苓

次韻魏伯元

公榮自可不與飲  
子美何時得細論  
正遇題輿陳仲舉

豈容無禮灌將軍

侯大淵惠花

揚州廟下子規啼  
曾看花開萬玉妃  
二十四橋明月夜  
春風十里捲簾時

和讀書臺入夜即事二首

池底星光箇箇添  
半鈎斜月吐纖纖  
數聲寒笛西風下  
人在朱樓捲暮簾

雲捲寒蟾玉暈添  
嫦娥遙想鬢毛纖  
此時清境非人世

要望烟霄不下簾

次韻盧贊元蒙田寺橋亭夜月

青版橋邊秋月明  
江風不動縠紋平  
沙頭野鶴摩天起  
飛入紫霄雲外鳴

次韻劉美中贈段居士

昨夜送人為太守  
今朝不記是何年  
歸來一粟菴中坐  
水在瓶中月在天

次韻贈慈書記

仰山慈書記往來安福道中數經我草堂識之舊  
矣復辱惠詩自敘老洪之裔蓋知僕與洪雅故不  
可不酬也感今懷昔為和三絕句蕪簡大仰祖禪

師亦覺範同門嗣也

慈猶記在湘西寺洪  
和予左字韻有云云

探驪猶記湘西寺愛我詩如左袒軍慈也果能拈此句  
定知詞筆帶烟雲

寂音尊者斷聲聞猶似街枚未戰軍橫出一枝來大仰  
如今不賦暮天雲

老洪作語驚一世筆力可敵千人軍足下馬駒今復出  
縱橫踏破嶺頭雲

次韻向文剛三絕

沈謝曹劉擬絕倫唯公詞翰可招魂新詩不拾前人語  
文彩風流自一門

吏案堆塵畚故紙茶甌浮雪動吟魂長官政擁黃紬被  
卧聽排衙晝掩門

詩仙句法可換骨豈但能蘇九死魂要自胷中出機杼

不須剽掠傍人門

兵火之後家藏墳籍蕩然寄居江邨欲借書諸

公先寄此詩

卜築江邨翠嶺均喜君書室近衡茅牙籤插架幾千冊  
準擬從頭借一抄

聞道藏書埒石渠仍能一讀五行俱不妨借我遮愁眼  
勝著閒牕飽蠹魚

甌陽廣明病中覓酒

滿徑蓬蒿貧不病一區寂寞奈愁何  
杜門芳草長楊賦  
可是無人載酒過

胡烈臣卧雲菴

小菴深隱紅塵外雲在茅簷四角邊  
月落烏啼天欲曉  
驚回何處夢遊仙

和葛德裕寄紙覓蘭四絕句

麗句雲箋敵夜光窮兒得寶但能藏  
慚無好語酬佳惠  
徒詠春洲杜若香

林下無人亦自芳幽姿閒澹若深藏與君坐上添幽客  
勝藝金爐百和香

君家詞翰妙天下蠶尾銀鈎世所藏贈我雲藍豈宜辱  
強吟春草拾餘香

兩朶幽花費詠章是中佳境若為藏何時同上瑤臺頂  
遍翫芝田蕙圃香

聽麟師誦經

念經衲子亂如麻心悟方能轉法華待得蓮花從口發

自牛車上覓三車

荅蕭道人

喚起赤龍耕玉池  
鵲巢抱出鳳凰兒  
且看火裏蓮花發  
十二樓前雪自飛

盧溪文集卷二十

欽定四庫全書

盧溪文集卷二十一

宋 王庭珪 撰

絕句

讀唐遺錄六絕

梁祖紀

深宮三鼓夜方分  
梁祖唯知慮太原  
錯料諸兒非彼敵  
斬關還入萬春門

李愚劉朐同傳

兩公罷相由諸吏提印驪呼頗自誇因謂我曹當快活  
月華門外聽宣麻

楊師厚

萬炬千釘照一城彩舟猶聽棹歌聲鐵車空駕黎陽石  
豈悟碑來禍已成

成汭

勞役三年成巨艦出師未戰失江陵不知雷滿和州載  
始悟齊山截海名

安審信

入閣趨班最後時  
崇元御史合彈之  
如何進奉二十萬  
便逐臺中乞索兒

馮道

大帝四朝成敗事  
惟君賣國作功臣  
平生自謂癡頑老  
晚節仍為謬語人

次韻盧贊元江亭即事二絕句

斜日江頭春又歸  
半天垂柳拂雲齊  
流鶯向晚渾無賴

隔水飛來枝上啼

江水磨銅鑑面寒  
釣魚人在蓼花灣  
雲間貪看新月上  
不覺小舟流下灘

縣尉任子嚴出示從軍陪大將吳侯遊石峒五  
絕句奉次元韻頌平賊之功云

東來騎火照松蘿  
野老逢迎笑語多  
共指巖前一方石  
將軍大劍可橫磨

石窟巉巖鬼不開  
狂童乘此起氛埃  
殿前兵馬何曾出

旗鼓初從天上來

錦帶雕弓銀馬鞍  
鳴鞭飛下白雲山  
回頭却望經行處  
已在青蒼杳靄間

不待皇恩下九天  
將軍兵已入盧川  
姦人妄獻招安策  
留客丹崖萬古傳

回師小度石門西  
鐵馬嘶風四百蹄  
不為從軍一時樂  
捫蘿攀徑豈能躋

贈筠州司戶施文叔二絕句

高軒過我不停輪風袂飄如出嶺雲渭北江東無盡意  
何時重得細論文

邨巷盡無車馬塵君來笑語動比隣兒童驚問此何客  
疊疊清言來逼人

送周解元赴岳侯軍二絕句

將軍欲辦斬樓蘭子欲從之路匪艱十萬竒才并劍客  
會看談笑定天山

書生投筆未封侯拔劍聊為萬里遊燕領果能飛食肉

要令豹尾出兜鍪

雪中贈別黃秀才

雪欲漫山水未澌梅花破雪吐寒枝溪橋漸見黃昏月  
應有橫斜倒影詩

劉虞卿衣弊履穿有號寒之憂賦絕句以道其  
意

江上丹楓半搖落簷間青女忽橫陳可憐范叔寒如此  
誰解綈袍念故人

次韻黃子餘二絕句

沈謝曹劉俱一體風流文彩自難兼  
黃香獨負無雙譽  
不管紅塵壓帽簷

秋風動地吹纖末  
夜雨連明攬寸心  
西北高樓何縹緲  
信非吾土莫登臨

次韻劉英臣早春見過二絕句

池草青青細吐芽  
夢回疑到惠連家  
東風未暇吹桃李  
先發寒梅第一花

春至盤蔬有蕨芽  
紙牕竹屋自成家  
客來清坐不飲酒  
旋破龍團潑乳花

送羅孟弼

并引

孟弼吾年家子也  
少年高薦未第今之行朝就蔭  
補兼謁徑山妙喜和尚

平步蟾宮脚  
夫梯當年才命巧  
相違遭時何必由  
場屋  
但著青袍騎馬歸

君到吳山莫問禪  
禪翁無法與君傳  
若從妙喜覓言句

掀倒禪牀却悄然

次韻周希稷餉耕三絕句

初下車來首勸耕  
老農爭走道邊迎  
歡聲便似承平日  
不待暮年政已成

夜聞催餉不成眠  
遙望官壺眼欲穿  
醉倒田間真快樂

念無田者益堪憐

東坡種麥得雪而喜復念  
無田者終夕為之不寐

莫厭行春馬足勞  
彈琴吟詠節彌高  
盡驅赤子持田器  
勿使潢池煩賊曹

贈寫真劉琮

并引

廬陵劉琮與其父俱以寫真名一時玉局老人自  
海上歸嘗贈以言由是士大夫益稱之紹興己未  
過廬溪草堂為余作隱居圖頗有勝處作三絕句  
曾寫峨眉玉局真遠看前輩畫麒麟此翁此畫不常有  
宜並銀鈎絕世珍

布襪青鞋倚瘦松我生骨相真生窮煩君畫著漁船上  
刺入廬江烟雨中

畫作蕭然物外身筆端如此有風神蹇驢破帽江南岸  
不是尋常行路人

送風雅長老并引

風雅長老自衡陽花藥山英鐵背座中相識一別  
數年訪余於安成將遊仰山謁超禪師留之不可  
作偈送之且速其歸也

集雲回雁兩峯前木馬嘶風鶴唳天他日歸來無一事  
却教誰出草鞋錢

送胡紹立往高陂遊學

天下干戈未盡稀，獨騎瘦馬苦吟詩。  
窮山窟裏攜書劍，半夜不眠聽鼓鼙。

遊湖頭觀桃花，行數里彌望不絕。  
有僧新開蘭若於萬花之中，留三絕句書辯公房。

十里紅香襯馬蹄，更穿林樾訪僧扉。  
烟長草遠望不斷，忽有鐘聲出翠微。

城內僧來城外住，寺邊花隔寺中籬。  
花開花落春如許。

宴坐深房總不知

方丈前林萬木春  
桃花面目更尖新  
為師拈出靈雲話  
却恐桃花解笑人

歐陽公制糧盡扣門索米戲書絕句送之

聞道瓶中無積粟  
不憂甑裏有塵埃  
饑時且就我索食  
更恐胡奴送米來

次韻趙逢源秋日溪居十絕

溪面微涼生晚風  
山銜落日半邊紅  
臨流解賦歸來句

知是柴桑避俗翁

門外仙槎泛急湍  
應從霄漢落銀灣  
歸來不記河源路  
風霧淒淒月滿山

水邊樓上最宜秋  
天在闌干四角頭  
覓句正緣償宿債  
著書元不為窮愁

仙人山水古今無  
畫妙詩工可得俱  
論畫已非前輩手  
聲詩能作輞川圖

出水芙蓉天與工  
六郎何事比花紅  
後生不識李元禮

試聽長松引勁風

南嶺浮雲過北嶺東  
溪流入西溪秋容清澹石骨露  
更看明年浪拍堤

昔人萬里醉為鄉  
暮越朝燕不裹糧  
却怕醒來塵外出  
千艘銜尾夜鳴榔

鷓鴣翻日影  
弄清溪溪上危巢鳴  
哺兒林下西風晚來急  
滿身木葉碎琉璃

千尋塔影照江清  
古殿金龍蟠繡楹  
秋色排門入蕭寺

閒來飯後聽鐘聲

題畫鯉魚

誰把吳松江剪斷得此鯉魚長尺半  
會逢李白過江來  
騎上青天遊汗漫

適從縣門下經西湖上歸見竹間桃花盛  
開湖  
上景物一新因成兩絕句呈向宰

彭澤門前惟有柳河陽縣裏只栽花  
如今夾竹開桃李  
猶似當年刺史家

何處春深刺史家園林猶鎖晉朝花風烟况接西湖水  
重起書齋對郡衙

再次韻二絕句

牆根巨竹新生笋竹下小桃初試花竹色花光正如此  
香風吹落幾千家

新竹高齋凝燕寢從教細雨落簷花青山綠水中為縣  
卧擁黃紬聽打衙

次韻韓宰上元二絕句

火炬銀花照眼明  
亂來誰得見昇平  
邦君解與民同樂  
海上初移不夜城

傷時此夜憶神京  
月照鰲山輦道平  
朱雀街門舊行路  
星球飛上鳳凰城

和劉英臣見寄二絕句

諸葛奇才當十倍  
謫仙詞句滿三千  
我惟閉閣捫書冊  
掃地燒香亦靜便

宵吞雲夢欲八九  
日誦古書常數千  
撐拄枯腸只堪睡

從君嘲我腹便便

幽蘭寄向文剛二絕句

西風黃葉深林下忽有新蘭動地香  
公子夜寒誰對語  
應容幽客到書房

連夜風吹碧玉枝山深寒重得香遲  
窮秋故出邁往韻  
要就高人覓好詩

次韻黃超然

楚詞賦物取香草衆草猶須避國香  
一辱雕章重題品

何慚清廟薦芝房

雪中遇胡烈臣歸自柳陽戲成一絕

路傍有客騎牛過  
乞與蓑衣作蓆眠  
邂逅若能相顧問  
和公畫上釣魚船

盧溪文集卷二十一

欽定四庫全書

盧溪文集卷二十二

宋 王庭珪 撰

絕句

衡嶽銓德觀作

并引

盧溪老人謫沅湘過此見故人胡明仲留題同司  
諫遊山之樂悵然有懷其人復過西房聽陳道士  
彈琴作松風夜雨聲因留二絕他日三君子不忘  
遊山之樂必再至焉為余出示此詩

峯頭烏帽翠雲裘三百年來無此流餘論更容平子否  
猶勝湛輩峴山遊

碧玉峯前雲滿徑赤欄橋畔柳參天長廊靜夜松風起  
寫得餘聲入響泉

清江張氏活人堂二絕句

遠系長沙太守孫謂仲景也家傳太守活人言刀圭一缺起

人死安得聲名不出門

海底龍宮失護防老龍偷得返魂方聞君夜壓春槽響

攜扣柴門乞酒漿

次韻謝昌國

今人不識古人心誰識羲皇太古音如望銀河九天上  
聊分一勺濯塵襟

雙田逢蕭國器話別

黃葉西風何處邛茅簷立馬問寒溫江東渭北情無限  
樽酒他時得細論

和康晉侯見贈

儒生無力荷干戈，亂後篇章感慨多。  
但拏筆頭吟白雪，莫挑馬箠渡黃河。

雪中以酒送歐陽廣明表叔明

小槽新壓甕頭春，盛欲招呼雪閉門。  
卧對表郎說周易，不妨伸頸飲清樽。

鄱陽周師禹求清軒霧齋詩

月入柴門夜色新，坐堅談壘足佳賓。  
誰云老子興不淺，政恐元規塵汚人。

細雨如烟下九垓始聞巖谷隱奇才一朝文彩驚人眼  
知自南山霧裏來

送彭士貴

并引

士貴好為竒偉倜儻之節今日見訪聞詔下出兵  
征北即日上馬欲遠遊其志甚壯賦二絕句以贈  
行

詔謂將軍急擊戎連營已列漢旗紅須君磨盾作露布  
破陣誰先第一功

大將威名震九州  
毛錐何補劍鎗頭  
但歌出塞從軍樂  
莫笑居鄉馬少遊

劉天錫之子八歲能作大字今年十三矣筆畫

愈進有雄健之氣作二絕句贈之

羣兒墨汁翻老鴉  
爾獨落紙生龍蛇  
郎罷不須頻掣筆  
渠今自會畫江沙

作戈如挽百鈞  
弩腕力想能回萬牛  
江夏當年有童子  
未聞落筆寫銀鈎

郊外留別友人

不及忽忽把一卮  
丹楓黃葉助題詩  
天教遠謫非無意  
更上沅湘看九疑

寄劉世臣仲美

此道陵遲久已亡  
後生無復立門牆  
遙知二子心如鐵  
端為盧溪一瓣香

贈無識道人

古廟香爐冷似冰  
向來土木弄精靈  
如今萬事都不會

却笑金剛努眼睛

謝張東言

忽見蛟蛇遶壁蟠歸時星斗已闌干  
山童不識回鸞字  
誤認題門作鳳看

惜春亭觀酴醾

東皇收拾春歸去獨遣酴醾殿後塵  
憐我寒牕賦愁寂  
時看玉面送殘春

彭青老好談禪喜作詩有謀身之語借其語激

之

未省前身是道人莫嗟求仕困無津東風動地泥牛吼  
簷蔔花開別是春

未能投筆取封侯一食聊須為口謀日向晴牕研破硯  
讀書當讀億那由

好詩渾厚如金玉妙質勿令斤斧侵要識筆端三昧力  
夜深山水自成音

漁父詞

冥冥江雨濕蓑衣  
夜上高巖宿翠微  
夢斷一聲烟草綠  
遙聞欸乃扣舷歸

贓上人頃脫塵網可謂俊哉衲僧也絕句贈之  
震林獅子非凡獸  
脫網鯉魚真衲僧  
宿垢消磨應已盡  
竿頭海底任橫行

盧溪文集卷二十二

欽定四庫全書

盧溪文集卷二十三

宋 王庭珪 撰

絕句

遊沅陵劉道人菴中唯一禪椅不置卧榻云不

睡四十年矣戲作二絕

一菴茅屋白雲深坐待丹砂欲變金誰信菴中人不睡  
滿池春水聽龍吟

九曲江邊雲欲淨三更海上月華孤金

缺

滄溟底

奪得驪龍領下珠

次韻陳君授暮春感懷

雨餘山鳥百般啼  
烟隔桃蹊一線微  
南北東西春總好  
杜鵑何苦勸人歸

辰州馬觀察送酒

壺頭直下開邊郡  
勲業誰如馬伏波  
還見遠孫持漢節  
坐令千騎擁雕戈

倒盡隣翁老瓦缸  
使君忽送玉為漿  
昌黎對月無詩酒

絕句聊酬馬侍郎

董仲儀來夜郎訪死生

雪覆鬼葬山頭路霧失鬼門關外邨不謂故人千萬里  
忽攜書冊夜敲門

我識君家董狀元草萊崛起跳天門揮毫玉陛摩星斗  
持橐明光奉至尊

次韻酬國子生趙秀才四絕句

淵明五柳非無宅子美西枝自有邨堪笑長安近時客

紛紛騎馬傍誰門

入關莫戀銅駝陌待詔行趨金馬門  
塲屋若歸丞相府可無公道得推尊

羨君將入銀蟾窟容我歸耕谷口邨  
遙想明年春殿下臚傳先出九重門

聖主方今舉八元何人復掃相君門  
迂生曲士如丘垤回首方知泰華尊

程子山侍講自靖州貶所歸相會于武陵怪余

顏鬢未改作四絕句示之

誤讀黃庭玉字章醉翻王母九霞觴從茲一墮人間世  
獨賴寬恩謫夜郎

問我何年謫夜郎尚餘疎髮未成霜夢朝玉帝窺香案  
偷得神仙不死方

欲弔沈湘乏雅章借君妙語酌餘觴已知絕倒如平子  
更喜清新似庾郎

莫把蓮花比六郎六郎元自不禁霜君看磔砢松千尺

高節參天孰可方

次前韻酬趙提幹

解作新詩似樂章  
交情風味敵壺觴  
平生閱士知多少  
聳壑昂霄見此郎

留滯沅湘見此郎  
氣如九月雁橫霜  
麻鞋踏雪穿沙底  
賜履他年出上方

謝郭景文寄魚鮓

開緘如見故人面  
仍喜故園風物來  
想見金刀落飛雪

何時斫膾共銜杯

雪中喜梁養源惠炭

雪裏烏薪絕市珍能令寒屋坐生春  
此中有句誰能道  
煖得曲身成直身

江上

沅陵春盡草萋萋忽見扁舟繫柳堤  
誰寄愁心與明月  
肯隨君到夜郎溪

竄居夜郎雪中杜門數日不出忽郡中送春來

始知今日立春

東風來從幾萬里雪擁江梅未放花  
忽見土牛驚換歲始知春色到天涯

寒食日孟司理送酒

兩翁俱是江南客寒食他鄉歎滯留  
燕舞鶯啼春未老一樽分我洗窮愁

郭仲質南牕

東風吹月下長汀牕外雞號天  
猝明時有諸生來問字

隔江猶聽講書聲

簷外羣山碧四圍  
風帆過盡小平堤  
先生獨坐紗帷裏  
掛起南牕月滿溪

夜坐聽沅江水聲

雨過風林生夜清  
坐邀明月正關情  
漁童酒醒莫吹笛  
要聽一江秋浪聲

水急灘高欲倒傾  
來如萬鼓遶山鳴  
奔流更借洞庭濶  
飛浪朝宗壯此聲

辰州立春清首座送生菜餅

聞道春風今日回走尋消息傍寒梅恨無纖手挑生菜  
也有青絲滿釘來

王巖老攜詩見訪詩未究雪下索余作詩贈之  
扣門有客懷珠玉被褐長吟坐晚暉雪打牕扉忽驚起  
還將破帽蓋頭歸

君歸大酉峯前住歲晚楓丹蕉葉黃試訪酉陽巖石裏  
秦人逸興未應亡

初寒方葺火閣而會溪知城周子康惠竹簾火  
爐寧公瑞惠蒲團便足了一歲無事矣作二

絕荅之

細柳將軍來護塞夜郎遷客正窮居火爐恰恰簾垂地  
足了三冬讀我書

戶外霜風入骨酸誰褰紙閣問平安正憂坐客寒無席  
遺我新蒲入突爨

寄贈王保躬求小山石

扁舟斗轉五溪灣  
湘北湘南飽看山  
袖裏雲岑皆寸碧  
一拳分手亦何慳

巖蟠蛟虎石骨瘦  
地飽霜風山脚寒  
我欲借君修月手  
為持玉斧劈烟巒

寄子老

并序

子老自江西來赴沅州報恩  
謂必取道辰陽翹俟  
久之忽得書乃趨徑路去  
已開堂矣奉寄二絕句  
以當相見也

半程蹉過夜郎溪不到昌溪問路岐空使辰州亭下客  
隔江招手立多時

古錦林邊獅子吼一聲驚倒五溪蠻何人來問山中景  
寺在千巖萬壑間

訪清首座觀薔薇

紅玉藥攢青玉枝羣芳淨盡獨開時只應天女回軒晚  
散得天花滿竹籬

花開花落春何在宴坐高僧總不知空色難謾禪伯眼

薈薇應待老夫詩

贈別陳君授 并序

紹興十九年余坐詩語竄夜郎遇太學生陳君授  
前二年上書言事忤秦太師意亦貶居是州二十  
五年冬秦太師病死遐方未及聞聖上慨然施曠  
蕩之恩盡放流人某與君授始獲生還感恩出涕  
作二絕句贈別

十載投荒坐獻書忽逢飛詔下荆巫歸來好上昇平頌

已死姦諛不足誅

雷雨沅湘振滯寬  
皇恩普出九重天  
乞兒猶戀權門火  
應謂死灰能復燃

離辰州

逐客休嗟行路難  
歸鴻心在杳冥間  
初驚草尾千重浪  
險渡湖頭十八灘

行盡黃茅白葦叢  
舉頭忽見兩三峯  
青青盡出湘天景  
如覺身離蠻蜒中

尋小舟東下忽見巨艦有作

本是蓬頭漁釣客飄如行脚水雲僧誰家巨艦和州載  
笑我扁舟一葉輕

次韻任子嚴

并引

余竄夜郎日惠門僧祖麟徒步萬里訪生死東歸  
過其寺見壁間題詩乃故人任子嚴見懷嘉麟之  
義而噓拂之也時士方以詩為諱而覩此作感激

次其韻

解訪江南處士廬行藏正自與時迂題詩更及夜郎客  
此段如今絕世無

君是石渠東觀人小邦聊見宰官身山僧似不孤題品  
衆角叢中有一麟

書覺範詩後

并引

余昔年遊嶽麓識覺範於南臺因留數日酬唱詩  
盈巨軸時侍者數人皆能詩而圓無在亦在焉別  
去既久圓忽攜覺範字見訪悲感疇昔復用覺範

韻題其後

憶探驪龍頷底珠湘江同賦夜啼烏當時吟罷鬼神泣  
此段如今掃地無

戲贈文彥明

江淹才盡一雙筆庾信窮生萬斛愁對客安能吐佳句  
牆東老駟正操矛

酒酣拔劍悲生事病起扶藜踏淺莎逆旅正如蝴蝶夢  
還家試聽庾彥歌

和羅思武作子房孔明二詩見贈

子房夜半叅黃石手握豹韜揮八極蒼黃忽起振長流  
天地風雲皆動色

三雄戰爭海水赤欲攬英豪扶紫極南陽喚起卧龍人  
至今草木生顏色

次韻周孟覺記皮老人事

皮老九十餘歲能談  
熙豐以前事但稍聾

耳

百年人物已無餘况說銅人鼓鑄初欲著承平舊時事

政須此老助潛夫

何物龐眉一老翁能談慶歷至熙豐只應坐厭聽鞀鼓  
到處逢人說耳聾

人壽何曾有百年再逢甲子換新元眼明重見清平日  
自可治聾聽好言


吉州凌波亭月夜

螺浦東邊雪浪生峯頭月出半輪明扁舟欲載銀蟾去  
一聽蒼龍水底鳴

贈日者張谷

余竄夜郎八年東歸至長沙遇日者張谷考十年前所言皆不謬余雖老然壽則非君妙術所得而推故末句云

夜坐吟詩竄夜郎君將何術考休祥近來偷得西華法不敢煩君算短長



盧溪文集卷二十三

欽定四庫全書

集部

盧溪文集卷二十四至  
七

詳校官左中允臣瑋五珠

主事臣呂雲棟覆勘

總校官知縣臣楊懋珩

校對官中書臣潘奕雋

謄錄監生臣莫與儔

欽定四庫全書

盧溪文集卷二十四

宋 王庭珪 撰

絕句

癸未春被召東山益老來賀曰趙州八十猶行

脚以詩答之云

八十心猶未悄然橫擔拄杖布行纏都城遊徧歸來日  
却使誰還湯水錢

寄張正伯求木樨

九里飛香隔岸聞  
繡簾朱戶闕清芬  
千林落蕊掃不盡  
分我幽牕一炷雲

送黃秀才歸臨川

傾蓋江頭酒一樽  
高樓驚坐去如雲  
別君無語獨長嘯  
尚想清音半嶺聞

夜郎東歸黃去非  
自雙井來惠以新詩妙畫次韻三絕句贈別

竄逐三危山盡頭  
出門入門誰與遊  
歸來頗復見此客

下筆論詩不肯休

派後江西出一枝傳家句法自新奇諸方知子善哮吼  
恐是窟中獅子兒

細看君詩如看畫無聲詩裏畫何如蟠育秀句吐不盡  
落筆因成赤鯉魚

贈別僧紹存

老存以相法隱于叢林為拈司馬頭陀話作二偈  
贈之

住山骨相無人識何處頭陀忽扣關第一座中聞磬教  
已知輸却大瀉山

踢倒淨瓶呼木楔華林已坐一生窮却教一座為山主  
都在頭陀相法中

和趙伯達二絕句

王孫疑是李長吉詩句兼如孟浩然亂後相逢初識面  
便當傾廩與談天

邂逅聞弦即賞音况逢清境夜攜琴一罇相遇烟霞外

不廢江湖萬里心

次韻彭青老詠雪三絕句

雪牕未怕筆頭乾能寫春江三峽寒  
笑指漁翁卧蓬裏不知流下釣魚竿

天公剪水散花林試比江梅色淺深  
梁苑詞人能賦詠終篇不作苦寒吟

莫倚雪車詩句好池臺草木待春風  
稍晴更上高樓望要看餘霞散晚紅

贈曦上人二絕句

學詩真似學參禪  
水在瓶中月在天  
夜半鳴鐘驚大衆  
斬新得句忽成篇

寺倚邛南澗  
水開終年行  
脚看山回  
盧仝欲洗塵埃渴  
入寺却愁曦未來

次韻劉惠直梅花二絕句

雪壓寒梢玉作容  
嶺頭相見又東風  
人間欲問春消息  
半在竹橋溪影中

吳姬玉面如相識寒立山隈欲下來先與江南作春色  
一枝傾倒向人開

夜郎歸日荅葛令惠詩

七載投荒萬里餘交遊半作曉星疎門前梅柳換新葉  
忽得故人相問書

南嶽張道人見訪言論疊疊若有所自非鹿鹿  
然者也撫其語作詩贈之三十年相見為汝  
掀髯一笑考其所自也

喚起赤龍耕玉池池邊龍虎自交馳周天一轂三十輻  
十二樓前看雪飛

次韻李宜仲以詩寄龍涎

愁眉此日為君開誰道嶺南無雁回邂逅江南逢驛使  
龍涎風味敵官梅

鵲噪柴門曉未開香風撩我夢驚回恨無好句酬高詠  
喚起謫仙蘇與梅

謗投三篋書猶在力挽九關天可回胡不北歸陳苦語

莫貪南海戀甜梅

戲向文剛生子

平生只欠掌中珠  
天與此兒聊慰渠  
郎罷新來著綵服  
要令啼戲覓銀魚

和曾英伯

江東渭北關心事  
樽酒論文更不疑  
馬上皺眉應得句  
詩筒聊復寄微之

雷秀才嘗學詩於呂居仁能談江西宗派中事

輒次居仁韻二絕贈行

逐客歸尋溪上居  
釣竿猶掛洞庭湖  
忽逢雷子談詩派  
傳法傳衣共一途

聞有牙籤萬卷藏  
槐花應笑舉人忙  
向來閱士知多少  
他日昂霄見此郎

周秀才取古物作十絕句見惠如豐城臨平鼓  
之類作一絕句題其後

衆寶沈埋萬古悲  
斬新拈出更題詩  
臨平石鼓無人識

誰把銅魚作鼓椎

贈寫真胡生二絕句

欲貌盧溪真面目非儒非佛亦非仙  
莫將踏碓盧行者  
喚作騎驢孟浩然

誤著儒衣到骨窮  
兒童拍手笑衰翁  
釣魚艇子今無恙  
置我五湖烟雨中

八月十四夜彥和置酒待月遇雨

君方置酒待月明  
便有微雲薄太清  
雨罷陰雲當解駁

且教霖雨慰蒼生

玉宇初涼江練靜夜深風雨更淒清從教洗出峯頭路  
雲破星翻月自生

坐待涼蟾雨欲傾一罇相對晚風清甲兵正要天河洗  
秉燭無妨對麴生

觀兢渡次壁間絕句

共坐南牕待月明雲間忽見大江橫釣魚船上誰家笛  
吹出騷人萬古情

紅旗畫鼓照江明兩岸爭看萬目橫奪得錦標誰助喜  
呼聲動地見真情

昔年買酒論文地回雁峯前雁陣橫白首相逢夜郎道  
不因生死見交情

心如止水貯空明還似虛舟盡日橫妙語忽然穿月脇  
筆端那有俗間情

謝子發惠茶

打門誰送雙圓璧驚覺茅簷晝日眠便覺清風生兩腋

夢魂飛到月輪邊

謁僧惠端不遇

僧扉深倚碧巖隈  
何處看雲久未回  
日暮鳴鐘應不語  
嗔人馬跡浣蒼苔

和劉端禮

時端禮  
失解

槐花又是一番黃  
天馬飄飄不可韉  
但得頃田耕負郭  
肯將斗酒博西涼

白面書生鐵作肝  
風雨未動劍長閒  
何時去斬匈奴首

直取西涼盡處山

才如天馬豈能羈  
爭看雲霓筆下飛  
齷齪不須談細務  
健毫留對冕旒揮

國材姪送林檎

嫩紅輕拂女兒臉  
淺綠深堆瑪瑙盤  
草木若能成好字  
來年早寄一枝看

贈清首座

上堂何事更論量  
還我珠來本自光  
未識飛猿嶺頭峻

兩回掀倒夾山牀

和裴主簿桃花

近水淺桃不忍看  
似臨清鏡惜紅顏  
騎驢主簿吟詩瘦  
應禿千毫筆管斑

秋蘭寄知縣陳邦直

昨夜西風茁紫芽  
不應獨著野人家  
安仁未倦栽桃李  
添此清香一種花

和荅邦直二首

惠愛如蘭正吐芽芳風吹落幾千家明年催直金鑿殿  
龍口飄香看百花

系出拾遺揚馬後清詞麗句復名家豈惟草木遭題品  
大筆行當判五花

美胡烈臣晚年生子

老蚌生珠喜可涯窮閭得寶亦堪誇如今七歲誦千字  
他日端能讀五車

和彭養正陳令尹

氣壓秋園百草芽風流宜在令君家但傾綠蟻伴清客  
莫羨黃金刻蘇花

和劉元弼見招

玉壺沽酒挈青絲及取春風花發時便把一罇留客醉  
莫教紅雨洗殘枝

贈相士

富貴本非吾輩事老來寧復問窮通餘齡幾許君知否  
願作昇平一老翁

問訊王道之病

居士病從何處起我今往問與誰俱  
室中三萬二千座更許盧溪下語無

贈宜春筆工

宣城一變宣城樣入手便如錐畫沙  
但喜中書頭未禿不妨詩老夢生花

步芳園

密栽桃李礙車輪柳下風微不動塵  
已辨尋春蠟雙屐

飛花滿地草如茵

湖頭觀桃李四絕句

路轉烟邨萬木春邨深疑有避秦人  
山農出谷驚相問不信邊頭有戰塵

朝騎一馬暮還歸盡日花間覓句遲  
黃四娘家誰敢道古來惟有少陵詩

城裏池臺俗儉窮却來城外探東風  
曲欄幽檻趣不遠春在郊原浩蕩中

春入千林烟雨中  
桃花李花能白紅  
一時草木披錦繡  
十里吹香墜晚風

茉莉花三絕句

纖雲捲盡日西流  
人在瑤池宴未休  
王母欲歸香滿路  
曉風吹下玉搔頭

火雲燒野葉聲乾  
厯眼誰知玉蕊寒  
疑是羣仙來下降  
夜深時聽珮珊珊

逆鼻清香小不分  
冰肌一洗瘴江昏  
嶺頭未負春消息

恐是梅花欲返魂

盧溪文集卷二十四

欽定四庫全書

盧溪文集卷二十五

宋 王庭珪 撰

挽詞

挽劉美中尚書

公方持橐我休官握手平生出肺肝  
豈是尚書先著履須知處士不彈冠  
文章進直金鑾殿槽櫪空餘寶馬鞍  
忍看銘旌下螺浦再攜斗酒餞江干

挽彭子從郎中

嶺北嶺南持使節湖西兼總大農錢廟堂正賴持國計  
蓬島祇為蛻骨仙郎省尚虛丹禁地銘旌忽上洞庭船  
衣冠不許掛神武端謂猶堪濟巨川

挽王自然二首

耆舊風流絕後塵尚容晚歲接冠巾英豪取友半天下  
論議常傾一座人橫槩陣前工草檄結廬江上老垂綸  
只今遺像髯如戟猶足堂堂聳縉紳

衣冠南渡塞螺川始識蓬萊王自然舌捲風雷翻海岳

學窮精稜出人天歸來元亮荒三徑老去揚雄有一壥  
斗酒隻雞思欲致無因下馬拜新阡

挽王夫人

周子充  
舍人母

憶昔諸郎從板輿當時人物渡江初蓬萊闕外雙飛鶴  
葬會漳南數郡車魄已成仙歸閨苑兒方着足上雲衢  
紫微即日趨嚴召八座無因問起居

挽盧宜人二首

陳晦叔  
夫人

崔盧唐舊族譜系自名門子舍三珠樹思劉七耳孫是

行將貴顯不及問平反坐脫無凡語人傳有至言

又

高風林下閨門裏幾歲長齋繡佛前夫子雄才尹大邑  
清魂獨樂上蓬仙化為雙鶴何方客來置束芻南郡賢  
會致送車填廣陌他時彤史亦須編

挽黃忠臣二首

憶昔相逢子少年詩書從我日磨研平生極力欲推挽  
世事驚人忽變遷未便噓枯送天上忍收遺骨葬江邊

雙親白髮終身恨不見青衫落眼前

書報登科墨未乾已聞弔客在門闌只傳金榜升華省  
不得丹梯上廣寒賦就兩番隨計吏花開一日遍長安  
誰知鬼錄南宮籍却作修文地下官

挽戴彥成通判

早歲同充上國賓與君先占廣寒春青雲尚記當時事  
黃土今埋如此人別駕朱幡泥飾屏縈紆茜綬帶銅銀  
生前富貴無餘恨痛念堂遺白髮親

挽劉公弼

弟兄詞賦喧場屋晚歲鄉閭譽益詳窗下殘編雕草木  
壁間遺翰走龍蛇蠟餘幾緡遊山屐書滿千篇載鹿車  
痛惜蒲輪迎未果寢門來哭淚橫斜

挽王修華

督賦寧居中上科治身從此得名多不聞老父踰垣走  
且聽兒童載道歌吏不捉人真快樂庭無留事足中和  
邦民盡作嬰兒泣忍送輜車返爛柯

挽劉英臣

累世以貴雄里閭惟公挾策似寒儒欲將那律九經庫  
定勝江陵千木奴玉樹諸郎新命貴錦囊丹誥寵光殊  
當時籍甚吳丞相思澤今歸兩鳳雛

挽徐子平

子平臨終神色不亂遣人告別且求挽詩為賦兩篇  
數椽破屋臨溪水日日讀書喧四鄰白首傳經窮到骨  
清風入座靜無塵堆窗史傳千張紙過隙光陰一轉輪

富貴掀天亦埃滅今時何必歎斯人

季子過徐因掛劍吾詩似劍敢欺徐才華本自輕場屋  
話訓猶堪授里閭踏雪打門人問字載穀從學酒盈車  
兒童誦得平生賦不是免園遺下書

挽羅荊老

初挾儒書戰舉場弟兄旗鼓亦相當探囊聊復起人死  
繫肘空餘濟世方漢苑舊嘗知姓字壺天今別有仙鄉  
老龍猶抱玉函訣夜扣柴門乞酒漿

挽鄭教授

仰高雖未接華裾清論時容著野夫掛劍未能臨死穴  
隔江何處奠生芻淒涼陶令松三徑寂寞揚雄宅一區  
挿架尚餘三萬軸傳家宜有鳳凰雛

挽曾氏安人

令儀早出閨中秀少日來歸丞相家能以功名勉夫子  
忍看旌旒起悲笳錦囊篆字金裝軸玉珮鳴裾帔有霞  
贈典有加兒亦貴誥黃新墨字如鴉

挽范孺人

少日來歸奉藻蘋一門冠蓋擁朱輪平生未識德公嫂  
比歲纔依孟母鄰魂返蓬萊三萬里鶴歸華表幾千春  
南州高士應匍匐忍看靈車下北津

挽瞿氏

徒身諸福壽尤豐魄返仙曹第幾宮西土夢星生太白  
東牀選壻得梁鴻豈無名士當時論自有夫人林下風  
來弔不知何處客化為雙鶴却飛空

挽易氏

媪有才子鄰我居父老欲起高門閭此媪不知家有無  
但典髻鬢供買書今朝慟哭城南道忍送喪車入秋草  
預愁來歲寒食時不見襄陽德公嫂

挽劉子儀

鬼伯歌朝露歸魂掩夜泉起家詩禮盛折桂弟兄賢箭  
落雙鵬日是歲二弟  
預薦名君當化鶴年阿鴻今已貴飛去欲

摩天

挽歐陽仁叟

郡從簪纓貴，騶僮意氣華。  
呼盧晉公子，大俠魯朱家。  
錦臂誇豪放，銀鞍走狹斜。  
忍尋桃徑裏，無主亦開花。

挽張氏安人

夫人經亂離，音信隔絕其孤趙。  
逢源號哭走萬里，至西蜀迎歸榮奉二十年。  
以壽終於其葬也，挽之以詩。  
母子未相識，哀號徹九穹。  
一生何敢望，萬里忽相逢。  
綵服舊兒戲，錦囊新誥封。  
悲歌滿行路，千載想遺風。

挽歐陽宜人

渤海家聲赫先朝御史孫霞冠宜象服腰笏擁魚軒五  
福壽尤貴兩兒名更喧惟嗟漢陽遠不及問平反

挽王氏夫人

劉英  
臣母

歲歟傾禾粟賓來剪髮鬢其人今已朽此事古尤難斜  
日銜峯頂秋風想珮環出門驚弔客雙鶴下雲間

挽王氏孺人

賜爵逢千載皇恩下九關誥詞金篆字珩珮玉連環陶

母今有後萊衣不復斑  
哀歌堪挽  
緋徒有淚潛潛

挽郭氏孺人

擇對真佳壻  
傳家好弟兄  
冤飛瑤海岸  
風斷玉簫聲  
舉案人何在  
埋文誰作銘  
潘郎今未老  
他日看衰榮

挽聶氏孺人

隴上龐公女  
相家裴十娘  
空門叅白足  
佳壻得黃香  
木馬風前響  
蓮花火裏芳  
彌陀真樂土  
環珮響鏘鏘

挽露氏恭人

華胄東京舊青樓大道邊渡江離險阻舉族得安全追  
賞榮身後褒封及眼前清魂在蓬島髣髴綴羣仙

挽丁陶明縣尉

東南作尉奉神仙化鶴家聲亦宛然臨欲騎魚歸海島  
猶能躍馬拓弓絃花間載酒經旬日陌上悲歌隔九泉  
尚有讀書臺下月夜深還照碧池邊

挽劉宗望

何年來卧北山霞猶指海邊團練家手把方書妙耕種

門高閣巷獨清華  
兩兒駒齒日千里  
萬卷牙籤架五車  
風動松篁起蕭瑟  
不堪回首聽悲笳

盧溪文集卷二十五